

Convenio de Colaboración entre a Consellería de Presidencia, Xustiza e Deportes e a Fundación Pública Galicia Europa para o desprazamento dunha persoa funcionaria en virtude da Disposición Adicional 2ª da Lei 10/2021 reguladora da acción exterior e da cooperación para o desenvolvemento de Galicia

Santiago de Compostela na data da sinatura dixital

REÚNENSE

Dunha parte, Diego Calvo Pouso, Conselleiro de Presidencia, Xustiza e Deportes, que actúa por conta e en representación da Xunta de Galicia, en virtude do Decreto 44/2024, do 14 de abril, polo que se nomean os titulares das consellerías da Xunta de Galicia (DOG nº 73, do 14 de abril de 2024), e en función das atribucións que lle confire o artigo 34 da Lei 1/1983, do 22 de febreiro, de normas reguladoras da Xunta e da súa presidencia.

Doutra parte, Jesús Mª Gamallo Aller, director da Fundación Pública Galicia Europa (FGE), que intervén neste acto por conta e en representación da mesma, segundo recollen os seus estatutos, no seu artigo 26.1.g), elevados a escritura pública perante o notario de Santiago de Compostela don José Manuel Amigo Vázquez, o 26.02.2024, co número 581 do seu protocolo, tendo a Fundación o seu domicilio na rúa do Hórreo, nº 61, código postal 15701 de Santiago de Compostela, con código de identificación fiscal G15140023.

Interven en función dos seus respectivos cargos e no exercicio das facultades que para convir en nome das entidades que representan teñen conferidas e que mutuamente se recoñecen.

EXPOÑEN

Primeiro.- Que as administracións públicas poden celebrar convenios de colaboración coas corporacións locais ou con outros entes de dereito público e con persoas físicas ou xurídicas ao abeiro do disposto na Lei 40/2015, do 1 de outubro, do réxime xurídico do sector público, e no artigo 6 da Lei 9/2017, de 8 de novembro, de contratos do sector público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014.

Segundo.- Que a Fundación Pública Galicia Europa (FGE) creouse ao amparo do artigo 34.1 da Constitución española e réxese pola Lei 12/2006, do 1 de decembro, de fundacións de interese galego e normativa de desenvolvemento, inscrita no Rexistro de fundacións de interese galego, con número 1988/1. É unha entidade sen ánimo de lucro e unha entidade instrumental do sector público autonómico de Galicia. Foi declarada de interese galego pola Orde do 24 de maio de 1988 e resúltalle de aplicación a Lei 16/2010, do 17 de decembro, de organización e funcionamento da

Administración xeral e do sector público autonómico de Galicia, en concreto, o artigo 118 de réxime orzamentario, económico-financeiro, de contabilidade e de control, e o artigo 119 de auditoría e control; dependente do padroado, coa composición e funcións que se determinan nos seus estatutos.

A FGE, creada para promover todas aquelas accións que propicien o achegamento entre Galicia e Europa, centra o seu labor en defender os intereses de Galicia ante a Unión Europea, promover a participación galega en proxectos europeos, e informar, formar e sensibilizar sobre a Unión Europea en Galicia. A Lei 10/2021, do 9 de marzo, reguladora da acción exterior e da cooperación para o desenvolvemento de Galicia recolle o mandato outorgado á FGE para exercer a representación autonómica galega ante as institucións e órganos da Unión Europea seguindo as directrices do Goberno autonómico e respectando os principios de unidade de acción exterior do Estado.

Segundo o artigo 44 do Decreto 36/2024, de 20 de maio, polo que se establece a estrutura orgánica da Consellería de Presidencia, Xustiza e Deportes, a Dirección Xeral de Relacións Exteriores e coa Unión Europea ten entre as súas competencias o seguimento das actuacións da FGE. En concreto, a coordinación técnica corresponde á Subdirección Xeral de Relacións coa Unión Europea e a coordinación de xestión corresponde ao Servizo de Xestión Económica, Administrativa e de Inspección e Control.

Terceiro.- Que segundo a Disposición Adicional segunda da Lei 10/2021, do 9 de marzo, reguladora da acción exterior e da cooperación para o desenvolvemento de Galicia, cando existan necesidades específicas do servizo, conxunturais ou motivadas polo aumento do volume de traballo que requiran reforzar as actuacións precisas para a tramitación, o seguimento ou o impulso da participación autonómica en asuntos da Unión Europea, os órganos competentes do sector público autonómico poderán de forma motivada encomendar estas funcións a persoal funcionario ou laboral e desprazalo, sempre que se conte en todo caso coa aceptación do dito persoal, ás oficinas da FGE, sitas en Galicia e en Bruxelas-Bélxica ou noutros países da Unión distintos de España, mantendo o seu réxime xurídico de orixe e posto de traballo, considerándose en servizo activo e percibindo as súas retribucións con cargo aos órganos ou ás entidades do sector público encomendantes. A duración deste traslado poderá ser de seis meses, prorrogable excepcionalmente por outros seis no caso de que se manteñan as referidas necesidades.

Cuarto.- Que Galicia debe asumir desde o 15 de febreiro de 2025 ata o 31 de xullo de 2026 a coordinación da Delegación española do Comité Europeo das Rexións (CdR). A Dirección Xeral de Relacións Exteriores e coa UE é o órgano ao que lle compete desenvolver este cometido, en representación da comunidade autónoma. Dado que o director xeral de Relacións Exteriores e coa UE é tamén o director da Fundación

Pública Galicia Europa, é preciso contar co apoio loxístico en Bruxelas e realizar as actuacións en colaboración con esta. Isto supón unha sobrecarga de traballo para a FGE respecto das súas actividades habituais, polo que necesita facer uso da dita disposición adicional segunda da Lei 10/2021.

Quinto.- Que a Consellería de Presidencia, Xustiza e Deportes considera esencial o apoio á FGE, polo que autoriza a que un dos seus funcionarios se desprace á sede da FGE en Bruxelas como reforzo do seu persoal por un período de seis meses prorrogables por outros seis.

Por todo o exposto, ambas partes acordan subscribir o presente convenio con suxeición ás seguintes:

CLÁUSULAS

Primeira.- Obxecto

O obxecto do presente convenio é establecer as condicións polas que se rexerá a colaboración entre a Consellería de Presidencia, Xustiza e Deportes e a FGE para o desprazamento dunha persoa funcionaria da dita consellería á oficina da FGE en Bélxica (Rue de la Loi, 38, 2º, bte.2 1040 Bruxelas).

A persoa funcionaria desprazada deberá ter coñecemento en lingua inglesa ou francesa (polo menos de nivel B2) e máis de 3 anos de antigüidade como funcionario da Xunta de Galicia. Valorarase a formación específica en asuntos comunitarios e a titulación universitaria en Dereito, Ciencias Políticas ou Relacións Internacionais.

O motivo deste desprazamento é atender as necesidades que ten a Comunidade Autónoma de Galicia ao asumir a coordinación da Delegación Española do Comité das Rexións (CdR). A dita coordinación implica asumir as seguintes tarefas, en coordinación coa oficina da FGE e coa Subdirección Xeral de Relacións coa UE:

1. Interlocución entre a Secretaría Xeral do CdR e os membros da delegación española:
 - Contacto e referencia dos membros da delegación española para a resolución de consultas e trámites de carácter administrativo coa Secretaría Xeral do CdR.
 - Centralización e distribución da documentación e información administrativa que afecte os membros da delegación española do CdR.
2. Apoio na organización da Reunión técnica:
 - Organización e loxística da reunión e convocatoria.
 - Redacción do informe e remisión aos membros da delegación española.

As reunións organízanse con carácter previo a cada Pleno (5 ou 6 plenos anuais).

3. Mesa do CDR:

- Remisión de toda a documentación relativa á reunión da Mesa aos membros da delegación española.
- Redacción e posterior remisión do informe da Mesa aos membros da delegación española.

4. Pleno e comisións do CDR:

- Control e seguimento diario dos documentos xerais, ordes do día, ditames e información relevante para a distribución no seu caso a delegación española.
- Información e seguimento das emendas presentadas polos membros da delegación española.
- Información e seguimento das conferencias, seminarios, plataformas de traballo e todo tipo de eventos e actividades nas que participen os membros da delegación española.
- Redacción e remisión do informe do Pleno (incluíndo todas as votacións de emendas de ditames) aos membros da delegación española na semana seguinte ao pleno.

5. Organización do traballo da delegación española:

- Organización e loxística da reunión de traballo da delegación española que se organiza coincidindo con cada Pleno.
- Interlocución entre a delegación española e outros órganos e institucións oficiais.

Segunda.- Condicións do desprazamento

1. A duración do desprazamento será desde o 1 de xuño de 2025 ata o 31 de maio de 2026.
2. A persoa funcionaria desprazada manterá o seu réxime xurídico de orixe e posto de traballo, considerándose en servizo activo e percibindo as súas retribucións con cargo á Consellería de Presidencia, Xustiza e Deportes.
3. A FGE aboará unha cantidade fixa de 1.000€ mensuais en concepto de axuda de aloxamento e 1.200€ mensuais en concepto de manutención, así como un único pagamento de 600€ como axuda de viaxe.
4. A FGE farase cargo dun seguro adicional de cobertura sanitaria en Bélxica coa finalidade de evitar o impacto que o copagamento belga puidera ter na asistencia sanitaria da persoa desprazada.
5. A persoa funcionaria desprazada poderá desfrutar das vacacións e demais permisos previstos para os funcionarios da Xunta de Galicia, nas mesmas condicións que se estivese no seu posto de orixe.

6. A persoa funcionaria desprazada poderá dispor dun terzo da súa xornada mensual para atender asuntos do seu posto de orixe, sen menoscabo das tarefas recollidas na cláusula primeira, para o que disporá de medios telemáticos para conectarse ao seu escritorio virtual.

A Fundación porá ao dispor da persoa funcionaria desprazada os servizos administrativos comúns da oficina, polo que a persoa desprazada deberá someterse ás condicións de uso que determine a Dirección da oficina, así como cumprir coas normas de réxime interno que dite aquela. Así mesmo, deberá acomodarse ao horario, xornada e demais elementos determinados polo réxime de funcionamento interno desa oficina.

O cumprimento, por parte da persoa designada pola Consellería de Presidencia, Xustiza e Deportes destas normas de réxime interno non implica ningunha relación laboral ou contractual desta persoa coa Fundación. De igual maneira, a FGE prestaralle á funcionaria desprazada pola Consellería asesoramento técnico e formación que o seu persoal puidera dispensarlle no exercicio das súas funcións.

Terceira.- Deber de información e colaboración

Para garantir a coordinación e unidade de acción da oficina da FGE en Bruxelas, no caso de que a persoa funcionaria desprazada realice algunha actuación ante as institucións europeas para a súa Consellería de orixe, deberá comunicarllo con anterioridade á Dirección da oficina da FGE en Bruxelas. Do mesmo xeito, a FGE deberá informar á persoa funcionaria desprazada das cuestións desenvolvidas que puideran ser relevantes para a súa Consellería de orixe. A Dirección da oficina velará en todo momento por salvagardar a unidade de acción da FGE.

Cuarta.- Crédito orzamentario

A persoa funcionaria desprazada percibirá da súa Consellería de Presidencia, Xustiza e Deportes as retribucións que lle correspondan polo posto que ocupa na dita consellería.

Como compensación polos gastos ocasionados á persoa funcionaria desprazada, a FGE aboaralle un importe para cubrir gastos de manutención e aloxamento mensuais, unha cantidade para gastos de viaxe e o seguro médico. Estes importes contabilízanse na conta "6500 Axudas monetarias individuais" do Plan Xeral de Contabilidade aprobado polo Real Decreto 1514/2007, de 16 de novembro, e detállanse deste xeito:

	Indemnización por manutención	Gastos de viaxe	Seguro médico	Axuda de aloxamento
2025	8.400,00 €	600 €	100 €	7.000 €
2026	6.000,00 €	-	-	5.000 €

Os importes indicados aboaranse por mes adiantado. Con posterioridade a cada mes, a FGE deberá remitir á Dirección Xeral de Relacións Exteriores e coa Unión Europea un certificado no que conste que a persoa funcionaria desprazada realizou as actividades obxecto deste convenio.

Segundo os artigos 5º e 6º do Decreto 144/2001, de 7 de xuño, sobre indemnizacións por razón do servizo ao persoal con destino na Administración autonómica de Galicia, as comisións no estranxeiro cunha duración superior a tres meses, terán a consideración de residencia eventual. Segundo o artigo 13 do dito decreto, o límite de indemnización de residencia eventual será igual ao 80% das axudas de custo enteiras que lle corresponderían ao funcionario segundo os artigos 9º e 10º do decreto, e a súa contía será fixada pola mesma autoridade que confire a comisión.

Cando nas comisións de servizo o persoal que estivese na situación de residencia eventual tivese que desprazarse de esta, percibirá durante os días que dure o citado desprazamento axudas de custo exclusivamente por aloxamento e os correspondentes gastos de viaxe, nas condicións establecidas para as comisións de servizo en xeral.

Quinta.- Designación da persoa funcionaria desprazada pola Consellería nas dependencias da FGE

A persoa funcionaria desprazada designarase pola Consellería de Presidencia, Xustiza e Deportes, mediante unha resolución de desprazamento. Como consecuencia a Consellería continuará a aboarlle a retribución que lle corresponda polo seu posto, así como as cargas sociais ou impostos que procedan. Os gastos de viaxes e indemnizacións en que incorra por razón do servizo, se aboarán segundo disposto na cláusula anterior. En ningún caso a FGE establecerá relación contractual algunha coa persoa desprazada non podendo ser responsable das súas retribucións nin cotizacións sociais, e só se fará cargo dos gastos recollidos neste convenio.

Antes da sinatura da resolución de desprazamento, a persoa desprazada deberá achegar á súa Consellería e á FGE, un escrito asinado no que acepte o desprazamento polo período de tempo indicado. No caso de que a persoa funcionaria desprazada cambie a un novo posto de traballo noutra consellería, a nova consellería poderá autorizar a continuidade do seu desprazamento. De non producirse a dita autorización, a Consellería poderá designar a outra persoa funcionaria para o

desprazamento, ata completar o tempo de duración máxima deste convenio. Así mesmo, a persoa funcionaria desprazada poderá renunciar ao desprazamento en calquera momento da súa vixencia, pero sempre con 15 días de antelación, o que implicará a resolución inmediata deste convenio.

Sexta.- Natureza xurídica das relacións profesionais

A colaboración da FGE coa Consellería non constitúe relación ou negocio xurídico ningún de orde civil, mercantil, laboral ou administrativo daquela coa persoa funcionaria desprazada. Do mesmo xeito, a Fundación non asumirá ningunha responsabilidade por lesións, danos ou prexuízos que puidera provocar ou sufrir a persoa funcionaria desprazada, fose por acción ou omisión, correndo por conta da Consellería as reparacións, indemnizacións e gastos precisos para restituír ao seu ser e estado orixinario o ben xurídico que puidera resultar afectado.

Sétima.- Fiscalización económica

Ambas partes sométense ao control da actuación obxecto do presente convenio por parte da Intervención Xeral da Comunidade Autónoma de Galicia, sen prexuízo das competencias que nesta materia corresponden ao Tribunal de Contas e ao Consello de Contas.

Oitava.- Información sobre protección de datos

As partes asinantes deste convenio outorgan o seu consentimento para que os datos persoais e o resto das especificacións que constan no citado convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, do Real Decreto 1720/2007, do 21 de decembro, polo que se aproba o Regulamento de desenvolvemento da LOPD, e demais normativa vixente de aplicación en cada momento en materia de protección de datos.

Novena.- Natureza xurídica e marco xurídico aplicable

O presente convenio ten natureza xurídico-administrativa polo que se rexerá pola Lei 40/2015, de 1 de outubro, de réxime xurídico do sector público, quedando fóra do ámbito de aplicación da Lei 9/2017, do 8 de novembro, de contratos do sector público, de conformidade co seu artigo 6.1.

Este convenio rexeráse polas súas propias cláusulas e a interpretación que destas realice a Comisión de Seguimento, así como pola normativa xeral que resulte aplicable, aplicándose os principios da antedita lei, para resolución de dúbidas e lagoas que puidesen presentarse.

Décima.- Comisión de seguimento e control

Constitúese unha comisión de seguimento e control, que levará a cabo o seguimento do presente convenio e resolverá os problemas de interpretación e cumprimento que se poidan presentar.

A comisión estará formada polo Director/a da FGE, ou persoa na que delegue e pola persoa titular da Secretaría Xeral Técnica da Consellería de Presidencia, Xustiza e Deportes, ou persoa na que delegue.

Se transcorridos quince días naturais desde a presentación da lagoa ou diverxencia, a devandita comisión non adoptara unha decisión, calquera das partes poderá denunciar o convenio e resolver a relación xurídica da que trae causa, sen prexuízo do seu sometemento ao que determinen os órganos xudiciais da orde xurisdiccional competente.

Décima primeira.- Xurisdición competente

As cuestións litixiosas derivadas da interpretación, modificación, resolución e efectos do presente convenio someteranse á xurisdición civil. As partes acordan someterse ao foro dos órganos xudiciais de Santiago de Compostela, onde ten o seu domicilio a FGE, renunciando a iniciar accións en calquera outra sede xudicial.

Décima segunda.- Obrigas de publicidade

Este convenio quedará sometido en canto a publicidade ao establecido na Lei 1/2016, do 18 de xaneiro e no Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décimo terceira.- Entrada en vigor e duración

Este convenio producirá efectos dende o 1 de xuño de 2025 ata o 31 de maio de 2026.

Décimo cuarta.- Resolución e modificación do convenio

As partes asinantes poderán modificar os termos do presente convenio en calquera momento, de mutuo acordo, mediante a sinatura dunha addenda.

Así mesmo, calquera das partes asinantes poderá proceder á súa denuncia expresa cun prazo mínimo de tres meses á data en que se pretenda a súa expiración.

Os convenios extínguense polo cumprimento das actuacións que constitúen o seu obxecto ou por incorreren en causa de resolución. O presente convenio entenderase resolto por algunha das seguintes causas:

- a) O transcurso do prazo de vixencia do convenio sen que se acordara a súa prórroga.
- b) O acordo unánime de todos os asinantes.
- c) O incumprimento, por parte dalgún dos asinantes, das obrigas e compromisos asumidos.

Neste caso, calquera das partes poderalle notificar á parte incumpridora un requirimento para que cumpra nun determinado prazo coas obrigas ou compromisos que se consideran incumplidos. Este requirimento seralle comunicado á comisión de seguimento e control da execución do convenio e ás demais partes asinantes.

Se transcorrido o prazo indicado no requirimento persiste o incumprimento, a parte que o dirixiu notificaralles ás partes asinantes a concorrencia da causa de resolución e entenderase resolto o convenio. A resolución do convenio por esta causa poderá implicar a indemnización dos prexuízos causados, se así se previu.

- d) Por decisión xudicial declaratoria da nulidade do convenio.
- e) Por calquera outra causa distinta das anteriores prevista no convenio ou noutras leis.

E en proba da súa plena e voluntaria conformidade coas estipulacións arriba consignadas, ambas partes asinan dixitalmente o presente instrumento.

Pola Consellería de Presidencia, Xustiza e
Deportes
O conselleiro
Diego Calvo Pouso

Pola Fundación Pública Galicia Europa
O director
Jesús M^a Gamallo Aller